



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

### 33. Kalenderwoche – ab 15. August 2010

## Laff is laff

Wissn Sie eischendlich, dass Sie von Gligg redn kenn, dass Sie das hier noch läsn kenn?

Nee, nisch weil Ihre Oochn noch guhd sinn...- isch meene, Sie ham Gligg, weil isch eischendlich dod sein kennde! Ja! Un wenn isch dod sein däde, dann kennde isch das hier nisch geschriem ham un Sie kenndn das nisch läsn! So is das!

Un isch kennde nähmlisch desvorweeschn dod sein, weil isch eischendlich zur Laffbarrehd nach Duisbursch fahrn wollde. Isch wollde das ma alles mid eischne Oochn erlähm, was da so abgehn dud. Mor had da ja jedes Jahr so Sachn geheerd un gesähn... wo die Laffbarrehd noch in Bärln gewähsn is... - das wolld isch ehm ma in leif sähn, wasses so fiehr Exodn gähm dud. Anfang von de halbnaggschn Mädels, iebor de vorliebdn Jungs bis hin zu de Haschmische. Es soll ja abor nisch bloß gehaschd wern. Jednfalls wolldsch das ma alles sähn. Von nahe!

Isch hadde mir ooch schon e Die-Schird gekoofd, wo "laff is laff" droffgeschdandn had.

Wennde nähmlisch immor bloß aus dor Ferne guggn dusd, kannsde nisch immor erkenn, was eischendlich los is. Aus dor Ferne da siehd mansches so nedd aus un friedlich, da kannsde een Dieschor fiehr eene Miezegadze haldn odor eene Gifdschlange für een Schniersenkel. Aus dor Ferne is alles e bißl harmlosor als wie in dor Wirglischkeid von Nahe.

Das is ooch bei meinor Gudstn so - aus eenor Endfernung von ungefähr finfhunnord Medorn siehd die gladd aus wie e Engl. Also, wenn se Flieschl hamm däde. Aus dähr Endfernung siehsde ehm

nisch, dass die Haare off de Zähne had. Un du siehst ooch nisch, wie die hämisch grien dud, weil isch nach Duisbursch wollde. Nee, meine Gudste hadde fiehr mein Wunsch nisch das geringsde Vorschdändnis gezeischd. Die häddn dord ooch ohne misch genuch Schwachköbbe.

Dabei wollde isch ehm bloß ma wissn, wie das is, wensde middn in iebor eene Milljon Mänschn schdehn dusd un nisch mähr vorwärts un nisch zurigg kannsd. Wensde so dodahl dor Masse ausgelieford bisd. Un wenn de dann ma bullorn mussd... odor du hasd Durschd... was dann? Das sinn doch Grunderfahrungen, die de brauchn dusd, wenn de in dor Freiheit zureschd komm willsd. Isch gloobe nähmlisch, mor kann sisch erschd so rischdisch frei fiehln, wemmor ma so rischdisch umzingeld gewähsn is. Odor wolln die alle ins Gedrängl, weil se mid dor Freiheit nischd anfang kenn? Weil se gahr keene Freiheit wolln? Sähnsuchd nachm Rudl?

Vorhindord had mein Ausfluch nach Duisbursch meine Gudste dann endgildisch, weil se misch gefrachd had, ob isch denn ooch wissde, dass bei dor Loffbarrehd Kussfreiheit is. Dass isch da mid jedor un mid jedem Rumgnudschn missde!

Nascha, isch bin da e bißl anfällisch. Un wenn isch misch ekln du, grisch isch so Blässchn off dor Libbe. Da bin isch dann doch bessor daheeme gebliehm. Das Die-Schird zieh isch jedzde immor im Gardn an. Da muss isch niemand gnudschn. Heeschdens - es kommd ma e Elsch vorbei.

**Eduard Sachsenmeyer**